

Date – 29/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. NPA la chung a pawisa la a damlo en thin doctor an awm tawh lo tih Mizoram Resource Mobilisation Committee-ah sawi a ni.
2. Vietnam rama a zin lai a bo ta ni a sawi Aizawl Mission Veng nula chu Laos ramah a awm tih hriat chhuah a ni.
3. Ruihhlo lem hmanga sumdawnna kaihhnawihah Police department hnathawk mi pali leh civil mi panga man an ni.
4. Union Home Minister Amit Shah-a'n Prime Minister Narendra Modi-a kaihhruaina hnuaiah kum 11 kalta chhung khan Assam leh hmarchhak state dangah hmasawnna nasa tak a thleng tih a sawi.

<><><>

MRMC ON NPA

Vawiina CM Conference Hall-ah Chief Minister Pu Lalduhoma kaihhruaiin Mizoram Resource Mobilisation Committee (MRMC) thukhawmna-ah doctor NPA la chung a pawisa la a damlo en an awm lo tih puan a ni.

MRMC thutkhawmah hian nikum April ni 23 a an lo rel tawh, Mizoram sorkar doctor ten Non-Practicing Allowance (NPA) la chung a private practice an awm chuan tihtawp ni se tia thutlukna an lo siam tawh bawhzuina an thlir a. Health & Family Welfare Department-in report a thehluh danin, sorkar doctor 452 an awm mek a, an zinga 347 ten NPA an la a, doctor 105 ten an la lova, NPA la chung a private practice an awm lo a ni. Mizoram Health Services Rules, 2009 behchhana Mizoram Gazette Notification February ni 18, 2010 leh December ni 18, 2024 siamthatna-ah chuan sorkar doctor (non clinical) private practice te chu NPA an lak a khap a, private practice turte pawhin phalna an lak a ngai a. Vawiina thukhawm hian a bawhzui zel dan tur an duang a ni. Aizawl khawpui chhunga sumdawnna kalpuitu GST Registration nei thei tura ngaih, registration la nei si lo te zawn chhuah hna Aizawl City Local Council Association nena tang tlanga thawh an rel a. Taxation Department lamin an bawh zui ang. Taxation Official-ten raid/verification an neih changa invenna atana silai (Arms) eng emaw kawh an dilna chu central sorkar leh state dangte tih dan angin, a tul hunah home department nena thawh dun dan lo ngaihtuah thin se, an ti a ni.

MRMC hian Administrative Reform Commission 2019 in sorkar file-in officer dawhkan pali chauh kal tlang tura rawtna an lo siam tawh chu tlema her rem deuhin department thenkhata enchhin turin DP & AR lama thlen an rel a. An ruahman dan chuan department pakhtah Under Secretary a awm chuan Deputy Secretary awm lo se, Deputy Secretary zawk a awm chuan Under Secretary awm lo se, tih leh, department pakhtah Joint Secretary a awm chuan Addl. Secretary awm lo se, Addl. Secretary zawk a awm a tul chuan Joint Secretary awm lo se, tih a ni a. A kalpui chhinna tur department erawh chu DP & AR lamin an ruahman ang. Importer & Exporter Licence holderten Lawngtlai district a KMMTTP kawngpui kaltlanga bungraw che vela chhiah pek a nih leh nih loh endik hna thawh dan tur rawtna an thlen chu zirchian ni se, an tih bakah Secretariat-a e-office kalpui a nih hnua a nghawngte zirchian ni se, an ti bawk.

<><><>

MNF

Kristmas vuakvet veta, Nalbari District, Assam-a Kristiante chung a hleilenna leh diriamna a thleng chu MNF party chuan na takin a dem thu vawiin khan an chhuah.

MNF party chuan he thilthlenga mawhphurtu dapchhuah leh man an ni chu lawmawm an tih thu an sawi a. Hindu firfiak/kalbing pawl, Vishua Hindu Parishad (VHP) te leh Bajrang Dal pawl ni a hriatte hian Panigaon-a Kristmas puala cheimawi nate chu hâlin, dawr leh mall te an hâl tel bawk a, an vau zui bawk niin an thuchhuah chuan a sawi a. MNF chuan hetiang a Kristiante chung a dodalna leh hleilenna hi thleng tawhlo se a duh thu sawiin Kristiante thlang an hauh tlat zel dawn niin an thuchhuah chuan a tarlang.

<><><>

MISSING

Mizo Diaspora Cell chuan an chairman Secretary to CM Pu Vanlaldina Fanai hmingin Ministry of External Affairs-ah email an thawh leh a, NI. Ellen Lalthlamuani (40), Laos rama awm mek ni a hriat chu India Embassy kaltlanga dawr sak turin (Consular Access) an dil.

Vawiin khan Chief Minister Office hnuaia din Mizo Diaspora Cell chuan Mizo nula bo chungchang hi an sawiho a. Ellen Lalthlamuani hi Vietnam-ah zinin, a lo haw tur chu biakpawh zui theih lohin a awm a. A chanchin an hriat rualin Mizo Diaspora Cell chuan Ministry of External Affairs tanpuina hi December ni 22 khan a dil nghal a. Diasporal Cell hian a theih ang anga chhui zui zelin, vawiin hian Laos ramah a awm niin an hre ta a ni. Hei hi an hriat veleh Ministry of External Affairs lamah sorkar leh sorkar indawrna hmanga Ellen Lalthlamuani chungchang kalpui turin an dil leh ta a ni.

Mizo Diaspora Cell chuan a lo sawi fo tawh angin, Mizoram pawn leh India ram pawna zin chhuak leh hnathawkte chu dan zawm tha turin a hriattir nawn leh a. Mahni bungrua ni lo, midangte thil thawh ang chi reng reng, enge a nih hriat chian loh chu lawmman tha tak pawh nei se, kensak lo turin a chah a ni.

He tih lai hian Salvation Army officer nupa, Maj. Lalthanmawia leh a nupui Maj. Rualthanpuui te, December 19 atanga an awmna chin hriat lohva awmte pawh chhui mek an ni. Home minister Pu K. Sapdanga'n Aklashvani Aizawl

Correspondent a hrilh danin Salvation army Officer nupa Myanmar a bote chu social media kaltlanga an lo hriat thu a sawi a. Official report an la dawng lo chung pawhin CID te'n ngawrh takin an chhui mek thu a sawi a. Hei bakah hian chief minister office (CMO) a Mizo Diaspora Cell pawhin an ngaihven reng a ni, a ti a. Myanmar rama Salvation Army Officer nupa bote chu sorkar laipuah thlen ala nih loh thu leh ngawrh taka dap mek an nih thu a sawi bawk a ni.

(Home Minister Byte)

Maj. Lalthanmawia te nupa hi Salvation Army Singapore, Malaysia, Myanmar and Thailand Territory hnuaia thawk an ni a. Myanmar rama Letpanchhawng khua a thawk an ni. Mizorama Krismas hmang turin an rawngbawlna Letpanchhawng khua atangin December 18 khan Tahan an pan a, a tuk December 19 zing dar 9 velah Tahan atangin Mizoram lam panin an chhuak leh a, chin hriat lohin an awm zui ta a ni a hriat a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

METH CASE

Aizawl SP Pu Zosangliana chuan tun thla ni 16 a Aizawl Police Station, Officer-in-charge in Special Narcotics Police Station hnen atanga FIR dawn bawhzuina kal zelah Police department hnathawk mi pali leh civil mi panga man an ni a ti.

He thu hi vawiina a pisa a chanchinbumite a kawmnaah sawiin Pu Zosangliana chuan tun thla ni 15 zan khan New Capital Complex thlanmual road-ah Methamphetamine hralh/lei a awm dawn ni a thu an dawn angin Special Narcotics Police Station hnathawkte chu New Capital Complex thlanmual road lamah hian an kal nghal a ni, a ti a. New Capital Complex thlanmual road an thlen chuan, Aizawl mi 3 (police mi leh sa vek) RL Remlalnghaka (28) Zemabawk North, Vanlalringa (32) Bungkawn Veng, Andrew Lalremruata (29) Chanmari Veng, leh Lalrinngheti (35) Venghlui chu kawngsirah awmin man nghal an ni, a ti a. Heng mite man an nih hnu hian an zinga pakhat phone call dawnin Khatla lamah Methamphetamine chu in hlan tura a rawn hrilh angin Khatla lamah an kal leh nghal a, Khatla ah hian Methamphetamine hralh tur lo kengtu hmeichhe pakhat leh Methamphetamine hralh tur a ken pawh chu mansak nghal a ni a. Methamphetamine an mansak pawh hi Methamphetamine tak tak ni lovin a lem a ni tih hriatchhuah a ni nghal bawk. An vai hian man nghal an ni a, police hnathawk mi 3 an man takte pawh hi an hna atanga chawlhtir nghal an ni, a ti bawk.

SP chuan he thil chhui zuina atanga a lan dan chuan an mi mante hi inthurual in dan phal loh damdawi lei duh tur an zawng a. An damdawi lei dan tur leh an inhlan na hun leh hmun tur te an ruat fel hnu-ah police mi leh sa te hi CID officer anga in sawiin an hmun ruat ah hian damdawi lei tumtute chu manin an damdawi leina tur pawisa chu tharum hmangin an chhuhsak ta thin a, heng an pawisa

chhuhsak hi a hnu ah an in sem leh thin a ni, a ti a. Anmahni inpuanna atanga a lan dan chuan hetiang thil ti hian a hma in vawi ruk ai tlem lo chu an lo hlawhtling tawh nghe nghe a ni. An mi man te an inpuanna atanga a lan dan in police mi leh sa tho Alex Lalnunfela (26) New Capital Complex pawh an thil tihna-ah hian a lo tel ve thin tih hriat a ni a, ani pawh hi man nghal a ni. An mi man te hi thu zawhfiah an nih hnu ah judicial remand in Jail lamah thawh vek an ni, a ti bawh.

He thubuai chhuizuina leh mi mante inpuanna atangin civil mi dangte pawh in hnamhnawih an lo awm a, chung mite chu Lalchhanhimi (40) Kulikawn, Lalnunpuii (41) Kolasib, Lalrinchhani (38) Lunglei Electric Veng leh Lalmalsawmi (41) Armed Veng South, Aizawl te chu man nghal vek niin thu zawh fiah an nih hnuah judicial remand hmangin jail ah thawh an ni a ti bawh.

<><><>

UNION HM VISITS ASSAM

Union Home Minister Amit Shah-a’n Prime Minister Narendra Modi-a kaihhruaina hnuaiah kum 11 kalta chhung khan Assam leh hmarchhak state dangah hmasawnna nasa tak a thleng a ni, a ti. He thu hi Assam Nagaon dist-a vawiina vantlang inkhawmah sawiin Pu Shah-a chuan hmar chhak bialin muanna leh hmasawnna a hmu ta a ti a, sorkar hmasa chu Assam hmasawnna tur ngaihthahah puhin na takin a sawisel bawh.

Amit Shah hian Guwahati Police Commissioner building thar leh Intelligence City Surveillance System a hawng a, mi sang 5 thut theihna tur, Jyoti Bishnu Cultural Complex a hawng bawh a ni.

<><><>